

## Vunn Berlin unn vumm Ardelgrawe

Vor e paar Daach habb isch uff de Gass dess Kättche getroffe, unn weil mir zwaa grad Zeid hadde, hawwe merr e bissi geschwäztz.

Honnes, seets Kättche, was denksden du iwver dess, wassmerr ewe su jeden Daach in de Zeidung lese dut, su mettem Strom, dass der alls deirer werrd unn dass dess mett de Energie ohne Atom doch nitt su klabbe det? Unn dass dessdeweese un aach weesche dem Griechelond unsren Euro nix mehr wert det werrn?

Kättche, frooch isch, hossde mol mettem Schorsch driwwer gebabbeld, was der moont? Heer uff mettem Schorsch, gibt's Kättche ze Antwort, der krätscht doch nor doorum. Mett dem iss nitt ze redde, ferr den iss die Welt schunn unnergonge, mir häddes nor noch nitt gemerkt.

No ja, saach isch, die gons Sach iss halt nitt su oofach. Klar iss, dass mir Alde ewe gons schee ängstlich sinn, weil unsren Vadder unn unser Mudder dess mett de Inflation erlebt hawwe. Dess muss schlamm gewese soi mett dene Millione in Babiergele, was omm nächsde Daach schunn nix mehr wert gewese iss. Naa, su schlamm, glaab isch, werrds nitt, awwer dass unser schee Geld immer wenischer werrd, merkt merr heit schunn doodroo, was dess Benzin kosde dut. Dess Lewe werrd halt immer deirer.

No ja, seets Kättche, mir Alde kenne joo sparn, aach beim Esse unn Drinke unn beim Fortfahrn, doo bleiwe merr halt dehoom. Awwer unser Junge, die hawwe dess Lewe doch noch vor sisch, was werrd mett dene? De Schorsch seet, dass die Politiker nitt genuch mache deete.

Kättche, saach isch, doch, die mache was. Awwer ess gieht longsom vor sisch in Berlin unn mett dene Parteie, unn dessdeweese sinn merr all zimlisch omm verzwaddschele. Awwer ess sinn die kloone Schrittscher, die omm End was brenge dun. Unn monches brauch halt soi Zeid. Isch denk doo grad onn de Ardelgrawe.

Ach, seets Kättche, vunn Berlin nooch emm Ardelgrawe – was iss mett dem?

Ei, saach isch, ich redd defoo, was die Nadurschitzer doo unne omm Ardelgrawe gemacht hawwe. Isch muss zugewwe, dass aach isch de erst emol gedenkt habb, was sollen dess, de Ardelgrawe uffarbeide ferr die Moofisch. Awwer wie isch jetz gelesen habb, sinn doo widder Fisch droi, die die gons Zeit fortgebliwwe warn, weil doo Stoo warn unn koon Sond unn so. Awwer die Leit vumm BUND wussde wasse wollde, hawwe johrelong geschafft unn de Erforsch hotten Recht gewwe.

Dess Kättche hott misch oo geguggd, dann frächtse: Unn was hott dess mett unserm Geld, mettem Strom unn mett Berlin ze due?

Isch habb gelacht: Weils enn Haufe Sache gibt, iwver die mir ersd emol de Kobb schiddele, weil merr moone, dess werrd nie ebbes, unn die noochher doch gons gut werrn. Die Oone misse was mache unn die unn all die onnern misse droo glaawe, dasses was werrd. Unn dess due isch dene Politiker in Berlin zutraue: Dasse was mache, dasses glaawe dasses rischdisch iss, wasse mache unn wenns aach long dauert bisses ferdisch iss, dasses halt droo glaawe, dasses omm End gons gut werrd. Mettem Euro un aach mette Energie.

Honnes, seets Kättche, isch wollt, du deetst Recht hawwe.

Ich saach: Hoffentlich. Unn saach emm Schorsch, die Welt deet nitt su schnell unnergieh, den Gefalle dut se uns nitt.

Eiern Honnes.